



საგანმანათლებლო პროგრამების აკრედიტაციის
საბჭოს გადაწყვეტილება
ქ. თბილისი



MES 4 20 0001054557



30/10/2020

შპს საქართველოს ეროვნული უნივერსიტეტის სეუს „საბანკო საქმის“ სამაგისტრო საგანმანათლებლო პროგრამისთვის აკრედიტაციის მინიჭებაზე უარის თქმის შესახებ

1. გადაწყვეტილების მიღების სამართლებრივი საფუძვლები:

1.1. „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „საგანმანათლებლო დაწესებულებების საგანმანათლებლო პროგრამების აკრედიტაციის დებულების“ (შემდგომში აკრედიტაციის დებულების) 27² მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „გ“ ქვეპუნქტისა და აკრედიტაციის დებულების 27⁵ მუხლის პირველი პუნქტის „გ“ ქვეპუნქტისა და ამავე დებულების 27⁶ მუხლის პირველი პუნქტის „დ“ ქვეპუნქტის შესაბამისად, საგანმანათლებლო პროგრამის აკრედიტაციაზე უარის თქმის თაობაზე გადაწყვეტილებას იღებს საბჭო, თუ საბჭოს მიერ საგანმანათლებლო პროგრამა აკრედიტაციის სტანდარტებთან შესაბამისობის შეფასებისას ერთ სტანდარტთან მიმართებით მაინც შეფასდა, როგორც „არ არის შესაბამისობაში სტანდარტის მოთხოვნებთან“,

1.3. „უმაღლესი განათლების შესახებ“ საქართველოს კანონის 66-ე მუხლის მე-4 პუნქტისა და „განათლების ხარისხის განვითარების შესახებ“ საქართველოს კანონის 24-ე მუხლის თანახმად, აკრედიტაციაზე უარის თქმის შემთხვევაში:

ა) უმაღლესი საგანმანათლებლო დაწესებულება კარგავს შესაბამის საგანმანათლებლო პროგრამაზე სახელმწიფო სასწავლო გრანტისა და სახელმწიფო სასწავლო სამაგისტრო გრანტის მიღების უფლებას;

ბ) ის სტუდენტი, რომელიც სწავლობდა სახელმწიფო დაფინანსებით, უფლებამოსილია გადავიდეს სხვა აკრედიტებულ საგანმანათლებლო პროგრამაზე და მისთვის გამოყოფილი სახელმწიფო დაფინანსების დარჩენილი ოდენობა გადაიტანოს ამ საგანმანათლებლო პროგრამაზე;

გ) უმაღლესი საგანმანათლებლო დაწესებულება წყვეტს რეგულირებადი, მასწავლებლის მომზადებისა და ქართულ ენაში მომზადების საგანმანათლებლო პროგრამების, ასევე დოქტორანტურის საგანმანათლებლო პროგრამის განხორციელებას. ამ შემთხვევაში სტუდენტებს 5 წლის განმავლობაში უჩერდებათ სტუდენტის სტატუსი და უფლებამოსილი არიან ისარგებლონ მობილობის უფლებებით.

2. აღწერილობითი ნაწილი და დასაბუთება

2.1. 2019 წლის 23 აგვისტოს შპს საქართველოს ეროვნულმა უნივერსიტეტმა სეუმ სსიპ - განათლების ხარისხის განვითარების ეროვნულ ცენტრში (შემდგომში - ცენტრი) №1681 წერილით (ცენტრში რეგისტრაციის №1081879) წარმოადგინა სააკრედიტაციო განაცხადი „საბანკო საქმის“ სამაგისტრო საგანმანათლებლო პროგრამაზე.

2.2. ცენტრის დირექტორის 2019 წლის 25 სექტემბრის №884 ბრძანების საფუძველზე, შპს - საქართველოს ეროვნული უნივერსიტეტი სეუ ცნობილ იქნა აკრედიტაციის მაძიებლად. ცენტრის დირექტორის 2020 წლის 8 იანვრის №02 ბრძანებით შეიქმნა ექსპერტთა ჯგუფი, რომელმაც 2020 წლის 16 იანვარს განახორციელა სააკრედიტაციო შეფასება, ხოლო 2020 წლის 2 მარტს წარმოადგინა აკრედიტაციის ექსპერტთა დასკვნა, რომლის შესაბამისად, სააკრედიტაციოდ წარმოდგენილი პროგრამა შეფასდა შემდეგნაირად:

სტანდარტები	შესაბამისობაშია მოთხოვნებთან	მეტწილად შესაბამისობაშია მოთხოვნებთან	ნაწილობრივ შესაბამისობაშია მოთხოვნებთან	არ არის შესაბამისობაში მოთხოვნებთან
1. საგანმანათლებლო პროგრამის მიზანი, სწავლის შედეგები და მათთან პროგრამის შესაბამისობა	•			
2. სწავლების მეთოდოლოგია და ორგანიზება, პროგრამის ათვისების შეფასების ადეკვატურობა		•		
3. სტუდენტთა მიღწევები, მათთან ინდივიდუალური მუშაობა	•			
4. სწავლების რესურსებით უზრუნველყოფა	•			

5. სწავლების ხარისხის განვითარების შესაძლებლობები	•			
---	---	--	--	--

2.3. საბჭოს 2020 წლის 24 მარტის N48 გადაწყვეტილებით, შპს საქართველოს ეროვნულ უნივერსიტეტ სეუს „საბანკო საქმის“ სამაგისტრო საგანმანათლებლო პროგრამას უარი ეთქვა აკრედიტაციაზე.

2.4 2020 წლის 3 ივნისს, სააპელაციო საბჭოს წარედგინა შპს საქართველოს ეროვნული უნივერსიტეტის სეუს სააპელაციო საჩივარი.

2.5 სააპელაციო საბჭოს 2020 წლის 5 ოქტომბრის N940852 გადაწყვეტილებით, საბჭოს ხელახლა განსახილველად დაუბრუნდა შპს საქართველოს ეროვნული უნივერსიტეტის სეუს „საბანკო საქმის“ სამაგისტრო საგანმანათლებლო პროგრამა.

2.6 საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითმეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია, აკრედიტაციის საბჭოს გასაჩივრებული გადაწყვეტილება და სააპელაციო საბჭოს გადაწყვეტილება.

2.7. ზეპირი მოსმენა გაიმართა 2020 წლის 16 ოქტომბერს. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიციის, ასევე სხდომაზე დაინტერესებული მხარის ზეპირი პოზიციის მოსმენის და სააპელაციო საბჭოს გადაწყვეტილების საფუძველზე, საბჭომ სრულად გაიზიარა აკრედიტაციის ექსპერტთა დასკვნაში ასახული შეფასება.

3. სარეზოლუციონაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „გ“ ქვეპუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „გ“ ქვეპუნქტის, ამავე კანონის 24-ე მუხლის, ასევე, აკრედიტაციის დებულების 27² მუხლის პირველი პუნქტის, 27⁵-ე მუხლის პირველი პუნქტის „გ“ ქვეპუნქტისა და მე-5 პუნქტის, ამავე კანონის 27⁶ მუხლის პირველი პუნქტის „დ“ ქვეპუნქტის, 28⁸ მუხლის მე-2 და მე-3 პუნქტების, 33-ე მუხლის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის N223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად,

გადაწყვიტა:

1. უარი ეთქვას შპს საქართველოს ეროვნულ უნივერსიტეტ სეუს ამ გადაწყვეტილების დანართი №1-ით გათვალისწინებულ „საბანკო საქმის“ სამაგისტრო საგანმანათლებლო პროგრამას აკრედიტაციის მინიჭებაზე.
2. ცნობილ იქნას „საბანკო საქმის“ სამაგისტრო საგანმანათლებლო პროგრამის შესახებ აკრედიტაციის ექსპერტთა ჯგუფის დასკვნა ამ გადაწყვეტილების განუყოფელ ნაწილად (დანართი №2).
3. ცნობილ იქნას საბჭოს 2020 წლის 30 ოქტომბრის №1054528 სხდომის ოქმის მესამე ნაწილი ამ გადაწყვეტილების განუყოფელ ნაწილად (დანართი №3).
4. საბჭომ არ გაიზიარა ექსპერტთა დასკვნაში ასახული რეოკმენდაციები/რჩევები:

კერძოდ, საბჭომ მიიჩნია, რომ მე-2 სტანდარტის შეფასება, ნაცვლად „მეტწილად შესაბამისობაშია მოთხოვნებთან“, უნდა შეფასდეს როგორც „არ არის შესაბამისობაში მოთხოვნებთან“.

5. საბჭომ დაამატა შემდეგი რეკომენდაციები და რჩევები:

რეკომენდაციები:

ა) რეკომენდებულია, გაძლიერდეს თანამშრომლობა დამსაქმებლებთან და კურსდამთავრებულებთან და უზრუნველყოფილ იქნას პროგრამის შემუშავებისა და განვითარების პროცესში მათი უფრო აქტიური ჩართულობა;

ბ) პროგრამის სპეციფიკიდან გამომდინარე, რეკომენდებულია, სასწავლო კურსი „ბიზნესის კვლევის მეთოდები“, მეტ დროს უთმობდეს კვლევის რაოდენობრივი მეთოდების შესწავლას, ასევე, მონაცემთა დამუშავებისთვის საჭირო პროგრამული უზრუნველყოფის სწავლებას. კურიკულუმში განისაზღვროს სტატისტიკისა და გადაწყვეტილების ანალიტიკური პროგრამული უზრუნველყოფის (Analytics Software Solutions) საკითხების სწავლება და გამოყენება;

გ) სტუდენტთა მიერ შესრულებული ნაშრომები შეფასდეს მარეგულირებელი წესით განსაზღვრული ნაშრომის მიმართ წაყენებული მოთხოვნების დაცვით;

დ) რეკომენდებულია, განხორციელდეს ხარისხის უზრუნველყოფის სამსახურის მიერ მომზადებული შეფასების, გამოკითხვების, ანგარიშებისა და სხვა დოკუმენტების სისტემატიზაცია პროგრამების მიხედვით. ასევე, გადამოწმდეს პროგრამის რაოდენობრივი მაჩვენებლები შემდგომი ტექნიკური ხარვეზების თავიდან აცილების მიზნით;

ე) საგანმანათლებლო პროგრამას დაემატოს და გაძლიერდეს ისეთი საკითხები, როგორცაა: ფინანსური ანგარიშგებები, „რიპორტინგი“, IFRS, შეფასების მეთოდები (Value Chain), ტექნიკური და ფუნდამენტური ანალიზი, დერევატივებში ოფციონები, ინვესტიციების მართვა, მონაცემთა ანალიზი;

ვ) კურიკულუმში წარმოდგენილ სასწავლო კურსში „საინფორმაციო სისტემების მენეჯმენტი“, მოხდეს შინაარსის გადახედვა, გარდა ამისა, იგივე საგანი იგივე შინაარსით და ლიტერატურით, გვხვდება ბაკალავრიატის საფეხურზე. ამ და საგანმანათლებლო პროგრამის განსაზღვრული სხვა სასწავლო კურსების განხილვის შედეგად, გამოიკვეთა სამაგისტრო საფეხურის მიზნებიდან გამომდინარე კურიკულუმის სტრუქტურის გადახედვა. სასწავლო კურსებისა და მისაღწევი სწავლის შედეგებთან ლოგიკური კავშირის დადგენა. მნიშვნელოვანია, სწავლის სფეროსა და მისანიჭებელი კვალიფიკაციის ურთიერთკავშირი და საერთაშორისო პრაქტიკის გამოცდილების გაზიარება, კერძოდ, სწავლის სფეროების კლასიფიკატორის მე-6 მუხლის მე-2 პუნქტის საფუძველზე საგანმანათლებლო პროგრამის სტრუქტურის ფორმირება.

ზ) საგანმანათლებლო პროგრამის კომპონენტებში გათვალისწინებული სწავლება-სწავლის მეთოდები გადაიხედოს და განისაზღვროს სასწავლო კურსის შინაარსისა და მისაღწევი სწავლის შედეგების სპეციფიკიდან გამომდინარე.

რჩევები:


ა) განხორციელდეს სასწავლო კურსებოს დატვირთვის (კრედიტის რაოდენობა), საათობრივი განაწილების - საკონტაქტოსა და დამოუკიდებელ საათებს შორის, ასევე საკონტაქტო საათების დროს სტუდენტთა სასწავლო დატვირთვის რევიზია.

ბ) აკადემიურ პერსონალს ხელი უნდა შეეწყოს და თავადაც მეტად უნდა იაქტიურონ რეფერირებად საერთაშორისო ჟურნალებში პუბლიკაციების განთავსების კუთხით.

6. საბჭოს აღნიშნული გადაწყვეტილება ძალაში შევიდეს მისი ცენტრის ვებ-გვერდზე (www.eqe.ge) გამოქვეყნების დღეს.

7. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის ქ. №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი, მე-12 კილომეტრი, №6, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) ცენტრის ვებ-გვერდზე (www.eqe.ge) გამოქვეყნების დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
სხდომის თავმჯდომარე
გეგენავა დიმიტრი



საგანმანათლებლო პროგრამების
აკრედიტაციის საბჭო
საბჭოს მდივანი
თიკანაშვილი ნიკა

